

Д.Серікбаев атындағы ШҚТУ Жоғары ІТ-колледжі



Ашық тәрбие сағаты

Тақырыбы: Желтоқсан жаңғырығы

Куратор: Солтанбекова Ш.О.

2020-2021 оқу жылы

Тәрбие сағатының тақырыбы: Желтоқсан жаңғырығы

МАҚСАТЫ:

Тәуелсіздік күні туралы терең мағлұмат беру. Тәуелсіздік үшін күрескен, желтоқсан құрбандарын еске түсіріп, соның ішінде Қайрат Рысқұлбековтың өмірін, ерлігі жайында түсіндіріп, оның ақындығын насихаттау, оқушыларға желтоқсан оқиғасы туралы мағлұмат беру. Оқушыларға патриоттық тәрбие беру, Отанды сүйуге және ерлікке баулу. Желтоқсан оқиғасында ел қамын жеген ерлерді үлгі тұту, өнеге алуға және халқының тарихын білуге үйрету, достыққа, ұйымшылдыққа тәрбиелеу.

САБАҚТЫҢ КӨРНЕКІЛІКТЕРІ: Желтоқсан құрбандарының өмірі мен шығармашылығына арналған презентациялар, бейнематериалдар (Желтоқсан құрбандарын еске алу, Желтоқсан оқиғасы, Құттықтау видеосы).

Тәрбие сағатының барысы:

Модератор сөзі (сынып жетекші):

Қайырлы күн құрметті ұстаздар, оқушылар, ата-аналар! ҚР Тәуелсіздік күніне орай ұйымдастырылып отырған “Желтоқсан жаңғырығы” атты тәрбие сағатымызға қош келдіңіздер!

1-жүргізуші: Құрметті ұстаздар мен оқушылар, халқымыз үшін ең қасиетті де қастерлі тәуелсіздікке 29 жыл толды. Аңсаған күнге қол жетіп, ақ түйенің қарны жарылған аса айтулы қуанышымыз құтты болсын!

2-жүргізуші: Тәуелсіздік жолы оңай жол емес, бұл жолда сан мыңдаған адамның арманы мен тағдыры тәлкекке түсті. Біздің еліміз бүгінгі күнге сондай қиынқыстау, даңқты жолдардан өтіп келіп отыр. Сондықтан да, тәуелсіздігіміздің мәні өзгеше, бағасы теңдессіз. Ендеше тәуелсіздігіміздің тұғыры әрқашан биік болсын!

1-жүргізуші: Бүгінгі “Желтоқсан жаңғырығы” деп аталатын тәрбие сағатымызды ашық деп жариялаймыз.

2-жүргізуші: Қазақстан жоғары Кеңесі 1991ж. 16 желтоқсанда Қазақстанды тәуелсіз Республика деп жариялады. Екі жүз жылдай патшалық Ресейдің отары, жетпіс жылдан астам Кеңес үкіметінің бұғауында болған Қазақстан егемен ел болды.

1-жүргізуші: Бұл күн — Қазақстан тарихында тәуелсіз Қазақстан Республикасының туған күні деп алтын әріппен жазылды. Сондықтан да желтоқсан бүкілхалықтық мереке. Желтоқсанда шәйт болған құрбандарымызды бір минут үнсіздікпен еске алайық.

Видео қосылады, Желтоқсан құрбандары бір минут үнсіздікпен еске алынады.

1-жүргізуші: Рахмет

2-жүргізуші: Бұл тәрбие сағаты 1986ж 16-17 желтоқсан күндері болған желтоқсан оқиғасына, онда бейбіт ереуілге шыққан, сонымен тарихта аты қалған желтоқсан көтерілісіне қатысушыларға, онда қаза болғандардың рухына арналады.

1-жүргізуші: Осы бір тағылымы терең оқиғаның себептеріне үңіліп көрейік, жауап іздейік.

1-сұрақ: Желтоқсан оқиғасының шығу себебі не?

1-оқушы: 1986ж 16 желтоқсанда Қазақстан компартиясы орталық комитетінің пленумы болды, онда Д.Қонаевты Қазақстан компартиясы орталық комитетінің бірінші хатшылығынан босатып, орнына Колбинді сайлады. Колбин Қазақстанда тұрмайды, онда қызмет етпеген. Міне, осы пленум шешіміне қазақ жастары бейбіт түрде наразылық білдіріп алаңға шықты. Жастар шеруі желтоқсан айының 17-18 күндері болды. Бұл оқиға сол себепті де тарихта желтоқсан оқиғасы деген атпен қалды.

2-жүргізуші:

2-сұрақ: Жастар наразылығы неге біздің және Мәскеу тарапынан қолдау таппады? Неге жаныштауға тырысты?

2-оқушы: Республиканың Колбин бастаған жаңа басшылығы олармен терезесі тең түрде пікір алысып, ұсыныстарына құлақ салуды намыс көрді. Олар әкімшілік-әміршілдік өктем көкірек, өр мінез көрсетті. Республикада тұратын 6 миллионнан астам адамнан, қазақтан лайықты ешкім таппай, сенімсіздік білдірген Мәскеуге қарсы бұл жастар қозғалысын олар ұлтшылдық, нашақорлық деп айып тағып, жаныштады.

3-сұрақ: Әділдік үшін күрескен жастардың қаншасы жауапқа тартылды?

3-оқушы: Бұл оқиғаға байланысты 103 адам жауапқа тартылды. 99-ы сотталды. Алматы қаласы бойынша 2401 адам қамауға алынып оқудан 309 студент шығарылған, 99-ның ішінде 2 адам өлім жазасына кесілген. Олар: Қайрат Рысқұлбеков, Мырзағали Әбдіқұлов. Желтоқсан оқиғасында ерен ерлігімен көге түскендер өте көп, солардың бірі – Қайрат. Ол қыршын жасын қиды. Оған үлкен айып тағылды.

2-жүргізуші: Әрине, желтоқсан құрбандары дегенде ең алдымен Қайрат Рысқұлбековтың, Ербол Сыпатаевтың есімдері ойымызға оралады. Олай болса келесі сөз кезегін Қайрат пен Ербол жайында презентация дайындаған оқушыларға берейік!

1-жүргізуші: Ұлы Отан соғысында көптеген батыр қыздар болды, Әзілхан Нұршайықов ағамыз айтқандай осы екі күнге созылған сұм соғыста елім деп, алаңда жүрген қыздар да болды! Ендеше батыр қыздарымызға арнап жасалған презентация иелеріне сөз берейік!

2-жүргізуші: Назарларыңызға Желтоқсан оқиғасы туралы тебіреніске толы бейнежазбаны ұсынамыз. Қабыл алыңыздар.

Видеожазба көрсетіледі.

1-жүргізуші:

Қара мынау ғажапқа,

Теңдік тиді қазаққа.

Езгідегі ұрпағың,

Енді айналмас мазаққа.

2-жүргізуші:

Өзіңдікі елің де,

Өзіңдікі жерің де.

Өзіңді өзің еткен бақ,

Тәуелсіздік төріңде.

1-жүргізуші: Мінеки құрметті көрермендер ”Желтоқсан жаңғырығы” атты тәрбие сағаты өз мәресіне жетті.

2-жүргізуші: Қазақ халқы мұндай қасіретке жолықпасын дей отырып, өздеріңізбен қоштасамыз. Сөз кезегін сынып жетекшіміз Сая Сайранбекқызына береміз.

Сынып жетекші:

Әр дәуірдің еркіне сай нарқы өзгерген алтынның,

Айналайын алтын әнім, жас өркені халқымның.

Желтоқсанда шындық жырын шырқаймын деп шарқ ұрдың,

Желтоқсанда егеменді ел болсам деп талпындың.

Өсер ұлдың қай сәтте де бірлік болмақ қалауы,

Лаула, лаула, Желтоқсанның мұзға жаққан алауы.

Өздеріндей ер намысты жас өркені бар елдің,

Ешқашанда еңкеюге тиісті емес жалауы

деп Мұхтар Шаханов ағамыз жырлаған екен. Шынымен де өздерің сияқты жас өркені бар елдің болашағы өте зор. Бүгінгі тәрбие сағатынан тәуелсіздіктің бізге оңайшылықпен келмегенін түсініп отырған боларсыңдар. Олай болса, көк байрағымызды құлатпай, биікте ұстауға ат салысыңдар, ел іргесі аман, жұртымыз тыныш болсын дегім келеді. Құрметті қонақтар осымен біздің тәрбие сағатымыз өз мәресіне жетті.

Құттықтау видеосы қосылады.

Соңы.